



BOLETÍN OFICIAL DO PARLAMENTO DE GALICIA

Número 653

VII lexislatura

25 de novembro de 2008

Fascículo 1

SUMARIO

(Versión electrónica en www.parlamentodegalicia.es)

1. Procedementos de natureza normativa

1.2. Proxectos e proposicións de lei

1.2.1. Proxectos de lei

—Informe da Ponencia sobre o Proxecto de lei de participación institucional das organizacións sindicais e empresariais máis representativas de Galicia

91616

1. Procedementos de natureza normativa

1.2. Proxectos e proposicións de lei

1.2.1. Proxectos de lei

De conformidade co disposto nos artigos 65 e concordantes do Regulamento da Cámara, ordénase a publicación no *Boletín Oficial do Parlamento de Galicia* do Informe da Ponencia sobre o proxecto de lei de participación institucional das organizacións sindicais e empresariais máis representativas de Galicia.

Santiago de Compostela, 25 de novembro de 2008

Dolores Villarino Santiago
Presidenta

Informe da Ponencia sobre o proxecto de lei de participación institucional das organizacións sindicais e empresariais máis representativas de Galicia

A Ponencia designada pola Comisión 1.^a, Institucional, de Administración Xeral, Xustiza e Interior, para emitir informe sobre o proxecto de lei de participación institucional das organizacións sindicais e empresariais máis representativas de Galicia, nas reunións e cos acordos que a continuación se indican, á vista do texto do proxecto e das emendas presentadas ao seu articulado, elaborou, para o seu debate perante o dito órgano, este

INFORME

1

Antecedentes

1.- O proxecto de lei tivo entrada no Rexistro do Parlamento o día 25 de setembro 2008, co número de rexistro 32175.

2.- A Mesa do Parlamento, na reunión do día 25 de setembro de 2008, dispuxo a súa publicación no Boletín Oficial do Parlamento de Galicia (BOPG núm. 614, do 27 de setembro de 2008) e a apertura do prazo de presentación de emendas que rematou o día 24 de outubro.

Así mesmo, oída a Xunta de Portavoces, acordou a súa tramitación pola Comisión 1.^a, Institucional, de Administración Xeral, Xustiza e Interior.

3.- As emendas presentadas —cualificadas pola Mesa da Comisión na sesión do 5 de novembro de 2008 e publicadas no BOPG núm. 641, do 6 de novembro de 2008—, foron un total de: 1 emenda ao articulado do G.P. Popular de Galicia (doc. núm. 33058 e corrección de erros doc. núm. 33133)

2

Constitución, composición e reunións da Ponencia

1. Constitución e composición da Ponencia.

A Comisión 1.^a, Institucional, de Administración Xeral, Xustiza e Interior, na sesión do día 10 de novembro de 2008, designou os seguintes ponentes

Polo Grupo Parlamentario Popular de Galicia: Dona Beatriz Mato Otero (Titular) e Don José Antonio Orza Fernández (Suplente)

Polo Grupo Parlamentario do Bloque Nacionalista Galego: Don Carlos Fernando Blanco Parga (Titular) e Don Iago Tabarés Pérez-Piñeiro (Suplente)

Polo Grupo Parlamentario dos Socialistas de Galicia: Don José Tomé Roca (Titular) e Dona María Soledad Soneira Tajes (Suplente)

2. Reunións da Ponencia

A sesión constitutiva da Ponencia tivo lugar o día 13 de novembro de 2008 e nela fixéronse a metodoloxía e o calendario de traballo.

Na derradeira reunión, que tivo lugar o día 19 de novembro de 2008, analizáronse os artigos do proxecto e as emendas presentadas.

3

Elaboración do informe

A Ponencia faille á Comisión as seguintes recomendacións; a aceptación da emenda núm. 1 do G.P. Popular consistente en engadir que non só a designación senón tamén o cesamento se realice de conformidade coas propostas formuladas polas organizacións sindicais e empresariais.

A Ponencia propón o rexeitamento das emendas núms. 2, 3 e 4 do G.P. Popular e a aceptación da emenda núm. 5 consistente en substituír que o destino da partida sexa para compensación económica por fomento da participación. Acorda propor o rexeitamento das emendas núms. 6 e 7. Recoméndaselle á Comisión a aceptación dunha transacción coa emenda núm. 10 do G.P. Popular que consiste en que substituír no parágrafo 6º a referencia ao texto refundido referido ao estatuto dos traballadores.

Rexeitan a emenda núm. 8 e acéptase cun cambio no estilo de redacción a emenda núm. 9, que consiste no seguinte: “Tamén a Constitución Española establece no artigo 7 do seu título preliminar...” Proponse o rexeitamento da emenda núm. 11.

A Ponencia propón á comisión a aprobación das emendas técnicas que a seguir se recollen:

I.- Segundo as directrices de técnica normativa as disposicións que declaren a pervivencia da norma antiga para regular as situacións xurídicas iniciadas con anterioridade, facilitando o tránsito do ao réxime previsto pola nova regulación son disposicións transitorias. Tendo esa vocación a actual disposición adicional segunda. Proponemos por tanto que a mesma pase a denominarse Disposición transitoria única

II.- Titular por harmonizar co resto do articulado as disposicións contidas no mesmo, que poderá ser do seguinte xeito:

Disposición adicional primeira. Adaptación normativa.

Disposición adicional segunda. Procedemento de modificación normativa.

Disposición adicional terceira. Participación institucional das organizacións

ou institucións representativas de intereses sectoriais.

Disposición adicional cuarta: Participación institucional no eido agrario

Disposición transitoria única: Réxime transitorio .

Disposición derogatoria. Derogación normativa

Disposición derradeira primeira . Desenvolvemento normativo

Disposición derradeira segunda. Entrada en vigor.

III.- A actual disposición adicional segunda fai referencia aos OOAA de Galicia, entendendo que do contido do proxecto e da súa exposición de motivos estase a referir a organismos públicos, termo máis amplo que comprende aos organismos autónomos, entidades públicas e axencias, segundo a lei 6/1997.

IV.- Na disposición derradeira segunda se remite as disposicións transitorias, debido a redacción que as mesmas tiñan no anteproxecto, deberá por tanto adecuarse a redacción actual. Pasan por tanto a ter a consideración de disposicións adicionais.

4

Texto articulado do Informe sobre o Proxecto de lei de participación institucional das organizacións sindicais e empresariais máis representativas de Galicia

Exposición de motivos.

As sociedades máis modernas e avanzadas teñen como característica destacada a institucionalización do diálogo social entre as distintas entidades territoriais e os axentes económicos e sociais representados polas organizacións empresariais e sindicais máis representativas.

A Constitución española asígnalles aos poderes públicos, como dispón o seu artigo 9.2, a promoción das condicións para que a liberdade e a igualdade do individuo e mais dos grupos nos que se integre sexan reais e efectivas, a remoción dos atrancos que impidan ou dificulten a súa plenitude e o facilitar a participación de toda a cidadanía na vida política, económica, cultural e social.

Nos mesmos termos realízase esta asignación aos poderes públicos galegos, segundo o disposto no artigo 4.2 do Estatuto de autonomía de Galicia.

Tamén a Constitución española no artigo 7 do seu título preliminar establece que os sindicatos de traballadores e as asociacións empresariais contribúen á defensa e á promoción

dos intereses económicos e sociais que lles son propios, e reconece o dereito fundamental á liberdade sindical no artigo 28, parágrafo primeiro, e o dereito de asociación no artigo 22.

O recoñecemento que a Constitución lles outorga ás organizacións sociais presentes no mundo laboral reflíctese tamén na normativa internacional, como é o caso do Convenio número 150 da Organización Internacional do Traballo-OIT, e, no ámbito da Unión Europea, a Comunicación do 12 de agosto de 2004 sobre o diálogo social europeo salienta a importancia adquirida polo diálogo social en canto ten contribuído a mellorar a gobernabilidade a escala económica e social, dado que as organizacións empresariais e sindicais, as direccións empresariais e os representantes dos traballadores e traballadoras nas empresas están moi próximos e coñecen de forma moi directa a problemática que se vive nos centros de traballo.

A Lei orgánica de liberdade sindical e o Estatuto dos traballadores atribúenlle o exercicio do dereito de participación soamente ás organizacións sindicais e empresariais que teñan a condición de máis representativas. Esta diferenza de trato entre organizacións baseada no criterio de maior representatividade foi considerada conforme coa Constitución polo Tribunal Constitucional, que conceptúa o dereito de participación institucional como parte integrante do contido adicional do dereito de liberdade sindical, que se pode atribuír a unhas organizacións e non a outras se o criterio empregado para iso responde a razóns obxectivas e non arbitrarias, coa garantía, en todo caso, do núcleo esencial dese dereito a todos.

Deste xeito, o marco legal pódelle atribuír ás organizacións sindicais e empresariais máis representativas unha posición xurídica relevante na participación na xestión dos asuntos públicos de natureza socioeconómica.

En Galicia, a participación das organizacións empresariais e sindicais máis representativas na xestión dos asuntos de relevancia pública ponse de manifesto polo recoñecemento da súa presenza nos órganos de dirección, asesoramento e participación da Administración autonómica ou de numerosas entidades e organismos públicos, co que se fai así efectiva na práctica a presenza institucional dos axentes sociais máis representativos no ámbito autonómico.

Precisamente, a maior parte do desenvolvemento efectivo do dereito de participación institucional atopa a súa orixe real nos procesos de concertación social, un activo indubidable do sistema democrático, como o que está a discorrer activamente en Galicia nestes momentos.

A existencia de numerosas normas autonómicas que regulan o exercicio do dereito de participación institucional aconsella ditar unha lei que, con carácter xeral, regule e ordene os criterios segundo os cales se poderá determinar que organizacións sindicais e empresariais máis representativas en Galicia poden participar nas diferentes entidades e organismos públicos da Xunta de Galicia.

O importante e relevante papel atribuído a estas organizacións xera, igualmente, a necesidade de regular os criterios de reparación económica dos custos nos que incorran con motivo das funcións derivadas desta participación institucional. Estas funcións atribúenselles exclusivamente por ter a condición de organización sindical ou empresarial máis representativa.

Galicia camiña, con esta lei, xunto a outras comunidades autónomas que teñen regulada por norma con rango legal a participación institucional no seu ámbito territorial respectivo, coa vontade de deixar claramente recollido o compromiso do Goberno de reconecer a implicación e a participación dos axentes sociais na vida económica e social do país.

O Parlamento fai uso así das posibilidades que ofrece o Estatuto de autonomía, cando lle atribúe á Xunta de Galicia a competencia exclusiva sobre as súas institucións de autogoberno, segundo o artigo 27.

En todo caso, as persoas que deben exercer as funcións correspondentes, nos termos que prevé esta lei, velarán polo interese xeral que é subxacente no desenvolvemento dos obxectivos e das atribucións que lle corresponden á entidade ou ao organismo correspondente.

Por último, cómpre destacar que constitúe obxectivo desta lei regular os correspondentes mecanismos de avaliación, seguimento e control, para que a xestión das compensacións económicas previstas para fomentar o exercicio do dereito de representación institucional por parte das organizacións sindicais e empresariais máis representativas se realice con transparencia.

Título I

Disposicións xerais

Artigo 1. Obxecto

1. É obxecto desta lei a regulación do marco da participación institucional das organizacións sindicais e empresariais intersectoriais galegas máis representativas en entidades públicas e organismos públicos integrados na comunidade autónoma de Galicia que teñan atribuídas competencias en materias laborais, sociais e económicas, que afecten os intereses económicos e sociais de traballadores e traballadoras e do empresariado.

2. Para os efectos do que se dispón nesta lei, enténdese por participación institucional o exercicio de tarefas e actividades de promoción e defensa no seo da Administración autonómica, dos seus organismos públicos e das entidades públicas dos intereses xerais, comúns, sectoriais e intersectoriais que corresponden a todos os traballadores e traballadoras e aos empresarios e empresarias.

Artigo 2. Criterios de representatividade

1. Son organizacións sindicais e empresariais intersectoriais máis representativas no ámbito de Galicia, para efectos do que se dispón nesta lei, as que teñan a devandita condición consonte o disposto nos artigos 6.2.a) e 7.1 da Lei orgánica 11/1985, do 2 de agosto, de liberdade sindical, e na disposición adicional sexta do Real decreto lexislativo 1/1995, do 24 de marzo, polo que se aproba o texto refundido da Lei do Estatuto dos traballadores.

2. Para a determinación específica do número de representantes destas organizacións nas entidades públicas e nos organismos públicos de Galicia aplicárase o criterio de maior representatividade no ámbito autonómico e de paridade entre as representacións sindicais e empresariais.

3. A designación e o cesamento das persoas representantes das organizacións sindicais e empresariais máis representativas de carácter intersectorial realizarase de conformidade coas propostas formuladas por estas organizacións a través dos seus órganos de dirección competentes.

4. Para os efectos do establecido na alínea anterior, terase en conta o disposto no artigo 28 da Lei 2/2007, do 28 de marzo, de traballo en igualdade das mulleres de Galicia, e na Lei orgánica 3/2007, do 22 de marzo, para a igualdade efectiva de mulleres e homes.

Artigo 3. Ámbito de aplicación

1. A participación institucional establecida nesta lei será aplicable respecto dos órganos de asesoramento e participación, e nos termos nos que a normativa específica de cada entidade ou organismo público así o estableza, nos seguintes ámbitos de intervención:

a) Entidades e organismos públicos integrados na Administración da Xunta de Galicia que teñan atribuídas competencias en materias de carácter laboral, social ou económico.

Inclúense todas aquelas entidades ou organismos públicos que teñan competencias en materia de traballo, emprego, formación profesional, economía social, políticas de igualdade, emigración e inmigración vinculada ao mercado de traballo e, en xeral, calquera outra materia de relevancia laboral ou social.

b) Entidades e organismos públicos integrados na Administración da Xunta de Galicia que teñan atribuídas competencias en materias socioeconómicas e de fomento do desenvolvemento económico e social da autonomía galega.

Inclúense todas aquelas entidades e organismos públicos que teñan competencias de desenvolvemento autonómico, políticas sectoriais, sociais e, en xeral, calquera outra competencia que, pola súa relevancia socioeconómica, se considere conveniente axear aos mecanismos de participación institucional que regula esta lei.

2. A regulamentación e o alcance da participación institucional definida na alínea 1 deste precepto desenvolveranse a través de decreto, dentro dos criterios expostos nesta lei.

3. Esta lei non lles será aplicable aos órganos sectoriais de participación ou negociación colectiva no ámbito da ocupación pública, que se rexerá pola súa regulación específica.

4. Esta lei non lle será aplicable á regulación do dereito de negociación colectiva no sector privado, que se rexerá polo que se dispón no título III do Real decreto legislativo 1/1995, do 24 de marzo, polo que se aproba o texto refundido da Lei do Estatuto dos traballadores.

Título II

Do contido da participación institucional e dos dereitos e deberes dos suxeitos participantes

Artigo 4. Contido da participación institucional

1. A participación institucional poderase facer efectiva a través da presenza da representación das organizacións sindicais e empresariais intersectoriais máis representativas en consellos ou órganos semellantes de dirección, participación, consultivos ou de asesoramento, nos órganos e nas institucións de participación ou en mesas ou foros específicos de negociación ou concertación socioeconómica, de acordo coas previsións que se determinan na normativa reguladora ou de creación de cada entidade pública ou organismo autónomo.

2. Esta participación tamén se fará efectiva na elaboración dos seguintes instrumentos de planificación da Xunta de Galicia:

— Plans de desenvolvemento rexional.

— Plans xerais de actuación sobre emprego e formación profesional.

— Plans xerais de actuación sobre o desenvolvemento empresarial e industrial.

— Plans xerais de actuación social e sanitaria, así como en calquera outro instrumento de planificación socioeconómica que, pola súa relevancia, sexa necesario someter a concertación social.

Artigo 5. Dereitos e deberes no exercicio da participación institucional

1. A representación das organizacións sindicais e empresariais intersectoriais máis representativas nas entidades e nos organismos públicos integrados na Administración da Xunta de Galicia levará a cabo as súas tarefas de participación institucional de acordo cos principios de boa fe negociadora e confianza lexitima.

2. Os órganos que teñan atribuídas funcións de participación institucional segundo a normativa específica da entidade ou do organismo público do que se trate en cada caso deben ter, como mínimo, competencias para:

a) Coñecer, con carácter previo, os anteproxectos de lei ou os proxectos de normas regulamentarias de desenvolvemento de normas legais, en relación coas materias da súa competencia.

b) Recibir información sobre os plans, os programas e as actuacións desenvolvidos verbo das materias ás que se refire o artigo 3.

c) Propoñer e participar na elaboración de criterios, directrices e liñas xerais de actuación en relación coas materias ás que se refire o artigo 3.

d) Propoñerlle ao Consello da Xunta de Galicia, a través da consellaría competente por razón da materia, a adopción de iniciativas legislativas ou de actuacións concretas que estimen convenientes nas materias obxecto de participación.

3. No seu labor, as persoas que exerzan funcións de participación institucional nos órganos correspondentes teñen os seguintes deberes:

a) Asistir ás xuntanzas dos órganos de participación institucional nos que a organización sindical ou empresarial á que se pertenza teña legalmente recoñecida a súa presenza.

b) Custodiar os documentos aos que se teña acceso con motivo do exercicio do dereito de participación institucional.

c) Gardar a confidencialidade debida sobre as deliberacións producidas nos órganos de participación e non utilizar a información obtida nas xuntanzas dos mesmos órganos, e que fose declarada reservada, para fins diferentes dos que se sometesen á consideración.

Título III

Do fomento da participación institucional

Artigo 6. Compensacións económicas

1. Coa finalidade de fomentar a participación institucional, anualmente a Lei de orzamentos xerais consignará unha partida orzamentaria destinada a compensar economicamente as organizacións sindicais e empresariais intersectoriais máis representativas. Para o seu libramento haberá que aterse ao disposto nas correspondentes ordes de libramento.

2. O aboamento das referidas compensacións económicas faráselles directamente ás organizacións empresariais e sindicais intersectoriais máis representativas por un importe proporcional á súa representatividade.

A fixación dos criterios de reparto da partida orzamentaria e do seu aboamento establecerase regulamentariamente.

3. A transferencia das compensacións económicas ás organizacións sindicais e empresariais intersectoriais máis representativas será compatible co dereito dos seus representantes á percepción das indemnizacións que, en concepto de axudas de custo e asistencia, poidan corresponderlles a título persoal.

Artigo 7. Xustificación e control das compensacións económicas e obrigas de colaboración

As persoas beneficiarias das compensacións económicas reguladas nesta lei estarán sometidas ás actuacións de control da actividade económica e financeira que lles correspondan aos órganos de control competentes da Xunta de Galicia e do Tribunal de Contas de Galicia, para o cal deberán prestar a colaboración necesaria e achegar toda a información que lles sexa requirida no exercicio das referidas actuacións.

Disposición adicional primeira. Adaptación normativa

No prazo máximo dun ano, contado desde o día seguinte da entrada en vigor do decreto ao que fai referencia o

artigo 3.2, iniciaranse os trámites para adaptar a participación institucional das organizacións sindicais e empresariais máis representativas nas diferentes entidades e organismos públicos integrados na Administración da Xunta de Galicia.

Disposición adicional segunda. Procedemento de modificación normativa

As organizacións sindicais e empresariais máis representativas ás que se refire esta lei deberán ser oídas no procedemento de modificación normativa da regulación dos órganos de participación institucional vixentes no momento de entrada en vigor da lei.

Disposición adicional terceira. Participación institucional das organizacións ou institucións representativas de intereses sectoriais

A participación institucional recollida nesta lei levarase a cabo sen menoscabo da representación que corresponde a outras organizacións ou institucións representativas de intereses sectoriais presentes nos órganos de asesoramento e participación da Administración autonómica ou de dirección, participación e asesoramento das súas entidades e organismos públicos de carácter sectorial.

Disposición adicional cuarta. Participación institucional no eido agrario

A participación institucional no eido agrario e de desenvolvemento rural rexerase polo disposto na Lei 1/2006, do 5 de xuño, do Consello Agrario Galego.

Disposición transitoria única. Réxime transitorio

Namentres se produce esta adaptación, seguirán vixentes todas as normas que regulan a participación institucional nas entidades e nos organismos públicos de Galicia.

Disposición derogatoria. Derogación normativa

Quedan derogadas todas as normas de rango legal idéntico ou inferior que se opoñan ou contradigan o que se dispón nesta lei.

Disposición derradeira primeira. Desenvolvemento normativo

A Xunta de Galicia adoptará as disposicións que sexan necesarias para o desenvolvemento regulamentario desta lei no prazo de tres meses, que se contarán desde o día seguinte á súa entrada en vigor.

Disposición derradeira segunda. Entrada en vigor

Esta lei entrará en vigor ao día seguinte da súa publicación no *Diario Oficial de Galicia*, sen prexuízo do que dispoñen as disposicións adicionais.

Santiago de Compostela, 19 de novembro de 2008

Dona Beatriz Mato Otero
Don Carlos Fernando Blanco Parga
Don José Tomé Roca

BOLETÍN OFICIAL DO PARLAMENTO DE GALICIA
ESTRUCTURA

1. PROCEDEMENTOS DE NATUREZA NORMATIVA
 - 1.1 LEIS E OUTRAS NORMAS
 - 1.2 PROXECTOS E PROPOSICIÓNS DE LEI
 - 1.3 OUTRAS PROPOSTAS DE NORMAS
2. PROCEDEMENTOS ESPECIAIS DE CARÁCTER INSTITUCIONAL
 - 2.1 INVESTIDURA
 - 2.2 MOCIÓN DE CENSURA
 - 2.3 CUESTIÓN DE CONFIANZA
3. PROCEDEMENTOS DE CONTROL E IMPULSO
 - 3.1 CONTROL SOBRE AS DISPOSICIÓNS DA XUNTA CON FORZA DE LEI
 - 3.2 COMUNICACIÓNS DA XUNTA DE GALICIA
 - 3.3 EXAME DE PROGRAMAS E PLANS
 - 3.4 ACORDOS, RESOLUCIÓNS OU PROPOSTAS DE COMISIÓNS ESPECIAIS OU DE INVESTIGACIÓN
 - 3.5 MOCIÓNS
 - 3.6 PROPOSICIÓNS NON DE LEI
 - 3.6.1 PROPOSICIÓNS NON DE LEI EN PLENO
 - 3.6.2 PROPOSICIÓNS NON DE LEI EN COMISIÓN
 - 3.7 OUTRAS PROPOSTAS DE RESOLUCIÓN
 - 3.8 PROCEDEMENTOS DE CONTROL ECONÓMICO E ORZAMENTARIO
4. PROCEDEMENTOS DE INFORMACIÓN
 - 4.1 SOLICITUDES DE COMPARECENCIA
 - 4.2 INTERPELACIÓNS
 - 4.3 PREGUNTAS
 - 4.4 RESPOSTAS A PREGUNTAS
 - 4.5 SOLICITUDES DE DATOS, INFORMES E DOCUMENTOS
5. PROCEDEMENTOS RELATIVOS A OUTRAS INSTITUCIÓNS E ÓRGANOS
 - 5.1 SOLICITUDE O GOBERNO DO ESTADO DA ADOPCIÓN DE PROXECTOS DE LEI
 - 5.2 PROCEDEMENTOS RELACIONADOS CO TRIBUNAL CONSTITUCIONAL
 - 5.3 VALEDOR DO POBO
 - 5.4 CONSELLO DE CONTAS
 - 5.5 OUTRAS INSTITUCIÓNS E ÓRGANOS
6. ELECCIÓN, DESIGNACIÓNS E PROPOSTAS DE NOMEAMENTO
 - 6.1 SENADORES EN REPRESENTACIÓN DA COMUNIDADE AUTÓNOMA
 - 6.2 VALEDOR DO POBO E VICEVALEDORES
 - 6.3 CONSELLEIROS DE CONTAS
 - 6.4 TERNA PARA A PROVISIÓN DE VACANTES DO TRIBUNAL SUPERIOR DE XUSTIZA DE GALICIA
 - 6.5 VOCAIS DA XUNTA ELECTORAL DE GALICIA
 - 6.6 MEMBROS DO CONSELLO DE ADMINISTRACIÓN DA COMPAÑÍA DE RADIO-TELEVISIÓN DE GALICIA
 - 6.7 MEMBROS DO CONSELLO ASESOR DE RADIO-TELEVISIÓN ESPAÑOLA EN GALICIA
 - 6.8 VOCAIS DOS CONSELLOS SOCIAIS DAS UNIVERSIDADES DE GALICIA
 - 6.9 VOCAIS DO CONSELLO DE BIBLIOTECAS
 - 6.10 DELEGACIÓN PARA A DEFENSA DE PROPOSICIÓNS DE LEI DO PARLAMENTO DE GALICIA NO CONGRESO
 - 6.11 OUTRAS ELECCIÓN, DESIGNACIÓNS OU PROPOSTAS DE NOMEAMENTO
7. COMPOSICIÓN DO PARLAMENTO, RÉXIME E GOBERNO INTERIOR, ORGANIZACIÓN E FUNCIONAMENTO
 - 7.1 COMPOSICIÓN DO PARLAMENTO E OS SEUS ÓRGANOS
 - 7.2 RÉXIME E GOBERNO INTERIOR
 - 7.3 ORGANIZACIÓN E FUNCIONAMENTO DO PARLAMENTO
8. ADMINISTRACIÓN DO PARLAMENTO DE GALICIA
 - 8.1 ORGANIZACIÓN E NORMAS DE FUNCIONAMENTO DOS SERVIZOS
 - 8.2 PERSOAL
 - 8.3 ACTIVIDADES
9. INFORMACIÓNS E CORRECCIÓNS DE ERROS
 - 9.1 INFORMACIÓNS
 - 9.2 CORRECCIÓNS DE ERROS



BOLETÍN OFICIAL DO PARLAMENTO DE GALICIA

Edición e subscricións: Servicio de Publicacións do Parlamento de Galicia.
Hórreo, 63. 15702. Santiago de Compostela. Telf. 981 55 13 00. Fax. 981 55 14 25